



POLITICA D'UFFANTS E DA GIUVENILS
EN IL CHANTUN GRISCHUN

Actualitads da la politica d'uffants e da giuvenils

02 / 2021

Allegra, Ciao, Grüezi

Stimadas partenarias e stimads partenaris da la politica d'uffants e da giuvenils

La politica d'uffants e da giuvenils en il Grischun ha survegnì schlantsch. Quai ans fa in grond plaschair. Plirs projects da mesiras han gia cumenzà. Gugent As dain nus ina curta invista dals projects currentes:

- Promoziun tempriva – dieta da rait ha lieu l'october
- Contribuziuns per projects innovativs cun uffants e cun giuvenils – inoltrar dumondas
- Kinder im Blick – curs per geniturs en separaziun
- Collocaziun d'uffants ordaifer la famiglia

Salids amicabels

Susanna Gadiant

manadra da l'Uffizi dal servetsch social dal Grischun

Beat Hatz

manader dal project Politica d'uffants e da giuvenils
Uffizi dal servetsch social dal Grischun

Dieta da rait
davart la strategia per la promoziun tempriva

7 d'october 2021
15.00 – 18.30, en l'Arena grischuna a Cazas

La strategia per la promoziun tempriva cuntinuescha. Ensemen cun las vischnancas ha il team da project gia elavurà las visiuns e las finamiras da la strategia per la promoziun tempriva. En in proxim pass duai ussa vegnir cumenzà cun la realisaziun.

Tge mesiras dovri per cuntanscher las finamiras da la promoziun tempriva? Qua essas dumandadas Vus sco personas spezialisadas. La dieta porscha in forum per cooperar e per cundecider. Gugent As envidain nus a questa occurrenza.



L'invitaziun cun las infurmaziuns detagliadas chattais Vus en l'agiunta. As reservai la data ed As annunziai fin ils 20 da settember. D'annunzia: kinderundjugendpolitik@soa.gr.ch.

La dieta sa drizza a personas spezialisadas che s'interessan per il svilup tempriv d'uffants, tranter auter dals secturs da las canortas d'uffants, da las gruppas da gieu, da la pediatria, da las spendreras, da la cussegliaziun da geniturs, da la lavur sociala, da la pedagogia curativa e.u.v.

«Per sustegnair mintga uffant uschè bain sco pussaivel, d'ovri purschidas gistas ed attractivas en tut il chantun – en las citads sco er en las regions perifericas. La basa per che la promoziun tempriva funcziunia è la comunicaziun, la collavuraziun e la confidenza tranter tut las parts participadas.»

Elisa Crüzer, coordinatura da la canorta d'uffants Nido Bregaglia e magistra primara a Malögia



Contribuziuns a projects – inoltrar dumondas

Rinforzar la participaziun sociala d'uffants e da giuvenils è ina finamira impurtanta da la politica d'uffants e da giuvenils.

Cun contribuziuns a projects concrets survegnan uffants e giuvenils en maun resursas per pudair realisar lur agens projects e per contribuir uschia lur part a la societad.

Cun meds finanzials dal fond da la politica d'uffants e da giuvenils sustegnain nus projects innovativs da vischnancas, da la lavur cun giuvenils u d'autras organisaziuns che vegnan sviluppsads en collavuraziun cun uffants e/u giuvenils ubain che uffants e/u giuvenils realiseschan en atgna reschia.

Enconuschais Vus projects u acturas ed acturs correspundents cun ideas grondiusas? Faschai attent quellas e quels a las contribuziuns da promoziun!

Dumondas pon vegnir inoltradas fin ils 31 d'october 2021.

[>Dumondas ed ulteriuras infurmaziuns](#)

Kinder im Blick



Sch'ils geniturs sa separan, sa mida bler – er per ils uffants. Durant quest temp dovran els spezialmain blera affecziun per dumagnar bain la midada a la nova fasa da la vita. Igl è impurtant ch'ins n'emblidia betg ils uffants, perquai che conflicts tranter ils geniturs pon esser in grond factur da ristga per il svilup dals uffants che sa chattan en in process da separaziun.

«L'egliada sin l'uffant» è ina purschida da curs per geniturs en separaziun. Ella gida ils geniturs a tegnair en egl ils uffants e lur basegns en questa situaziun pretensiusa. Il program da prevenziun fundà scientificamain vegn purschì da la Psichiatria d'uffants e da giuvenils dals Servetschs psichiatrics dal Grischun SPGR. La Politica d'uffants e da giuvenils en il Grischun sustegna il program cun ina finanziaziun da partenza.

[>Purschida da curs ed ulteriuras infurmaziuns](#)



Rinforzar ils dretgs da l'uffant – recumandaziuns per la collocaziun d'uffants e da giuvenils ordaifer la famiglia

Sche uffants na vivan betg tar ils geniturs...

La Conferenza dals chantuns per la protecziun d'uffants e da creschids (COPUC) e la Conferenza da las directuras e dals directurs chantunals dals affars socials (CDAS) han relaschè il schaner 2021 cuminaivlamain recumandaziuns davart il tema da la collocaziun ordaifer la famiglia. Las recumandaziuns defineschan standards minimalis qualitativs cun la finamira da rinforzar ils dretgs da l'uffant. Ina idea directiva è la participaziun e la cundecisiun consequenta che resguarda la vegliadetgna dals uffants pertutgads en tut las fasas da la collocaziun ordaifer la famiglia.

En il rom dal project Politica d'uffants e da giuvenils examinescha l'Uffizi dal servetsch social ensemen cun la APUC la situaziun en il chantun Grischun. Els tschertgan respostas sin las dumondas: Co è la situaziun actuala? Tge pudain nus meglierar? E co pudain nus realisar las recumandaziuns?

[>Ulteriuras infurmaziuns davart las recumandaziuns](#)